



Datë: 05.11.2025
Numër Protokolli: 7215/2025

A.nr.1696/2025

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Malsore Gashi Bajraktari, kryetare, Ardita Haxhnikaj-Demi dhe Eshref Shabani anëtarë, me Hava Fekaj, në cilësinë e procesmbajtëses, në procedurës sipas ankesës me numër A.nr.1696/2025, të datës, 15.09.2025 të parashtruar nga ankuesja E.P, kundër organit të punësimit: Ministria e Industrisë, Ndërmarrsise dhe Tregtisë, në çështjen juridike “*kompensim material*”, duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datën 05.11.2025, mori këtë:

V E N D I M

Hedhet poshtë si e parakohshme ankesa me numër A.nr.1696/2025, të datës, 15.09.2025 të parashtruar nga ankuesja E.P.

A r s y e t i m

Ankuesja E.P (tutje referuar vetëm ankuesja), më datë 15.09.2025, përmes emailit ankesa.kpmschck@rks-gov.net, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, e regjistruar në Këshill më datë 15.09.2025 nën shenjën A.nr.1696/2025, Kundër Vendimit Ref.02 Nr.25, me Nr. Protokolli.469/02, të datës 07.02.2025 të lëshuar nga U.D Sekretare e Përgjithshme e Ministrisë së Industrisë, Ndërmarrsise dhe Tregtisë, për shkak të refuzimit të kërkesës për Kompensimin e Funkcion Shtesë si anëtare e komisionit për “Kontrollin e Tregtisë me Mallra Strategjike”.

Këshilli i Pavarur Mbikëqyrës për Shërbimin Civil i Kosovës, bazuar në dispozitat e Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregullores Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datë 24.09.2025 ka kërkuar përgjigje në ankesën e ankuesve në Ministrisë së Industrisë, Ndërmarrsise dhe Tregtisë, ndërsa kjo fundit më datë 29.09.2025, ka përcjell përgjigje në ankesë.

Kolegji për Shqyrtimin dhe Vendosjen e Ankesave, për shqyrtimin e kësaj lënde ka administruar këto prova: Ankesën me numër protokolli 6142/2025 të datës 15.09.2025, e parashtruar nga ankuesja në Këshillin e Pavarur Mbikëqyrës të Shërbimit Civil të Kosovës; Kopjen e letërnjoftimit të ankueses; Vendimin me Nr.08/121 të datës 25.01.2023;Vendimin Ref.02//Nr..25 të datës 07.02.2025;Rregulloren Nr.01/2022 për Organizimin dhe Sistematizimin e vendeve të Punës në Ministrinë e Punëve të Jashtme

dhe Diasporës. Formularin për Regjistrimin e Ankesës. Kërkesën për përgjigje në ankesë të datës 24 shtator 2025 dhe përgjigjen e datës 29.09.2025;Emailin e datës 11.09.2025.

Kolegji i Këshillit pas shqyrtimit dhe analizimit të shkresave të lëndës të parashtruara nga palët në procedurë, ka konstatuar se ankesa e ankuesit është e parakohshme, **sepse:**

Ankuesja në ankesën e parashtruar në Këshillin e Pavarur Mbikëqyrës për Shërbimin Civil të Kosovës, e ka parashtruar kundër Vendimit Ref.02 Nr.25, me Nr. Protokolli.469/02, të datës 07.02.2025 të lëshuar nga U.D Sekretare e Përgjithshme e Ministrisë së Industrisë, Ndërmarrsisë dhe Tregtisë, për shkak të refuzimit të Kërkesës për Kompensimin për Funksion Shtesë si anëtare e komisionit për “Kontrollin e Tregtisë me Mallra Strategjike”.

Tutje nga shkresat e lëndës, ankuesja më datë 11.09.2025 nëpërmjet e-maili, ka parashtruar kërkesën e fundit tek z. A.Xh përmes të cilës ka kërkuar kompensimin e shtesës për kushte të tregut sipas rregullores 02/2023 të miratuar nga Ministri e Financave për shtesën dhe kushte të tregut të punës, mirëpo i njëjti nuk i është përgjigjur Kërkesës së ankueses të dërguar më datë 11.09.2025 nëpërmjet e-maili.

Kolegji i Këshillit lidhur me pranueshmërinë e ankesës së ankueses, ju referuar dispozitave ligjore të Ligjit Nr.05/L-031 për Procedurën e Përgjithshme Administrative, gjegjësisht nenin 98 paragrafin 1 dhe 2, ku përcaktohet se: *1. Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure. 2. Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj*”, si dhe nenin 127 paragrafi 1 dhe 4 i të njëjtët ligj, përcaktohet se: *“1. Ankesa duhet të parashtrohet brenda tridhjetë (30) ditëve nga data kur pala është njoftuar për aktin administrativ. 4. Ankesa kundrejt heshtjes administrative mund të parashtrohet jo më herët se shtatë (7) ditë dhe jo më vonë se dy (2) muaj pas skadimit të afatit për njoftimin e aktit administrativ.*

Ndërlidhur me këtë, Kolegji i Këshillit në bazë të shkresave të lëndës si dhe konstatimeve të dhëna si më lartë në arsyetimin e këtij vendimi, konstaton se ankesa e ankueses e datës 15.09.2025 e parashtruar në Këshillin e Pavarur Mbikëqyrës për Shërbimin Civil të Kosovës është e parakohshme, ngase e njëjta është parashtruar në kundërshtim me nenin 127 paragrafi 4 të Ligjit Nr.05/L-031 për Procedurën e Përgjithshme Administrative, pasi që institucioni punëdhënës lidhur me kërkesën e ankueses të datës 11.09.2025. Ndërsa ankuesja ankesën në Këshillin e Pavarur Mbikëqyrës për Shërbimin Civil të Kosovës e ka parashtruar më datë 15.09.2025, e që sipas Kolegjit të Këshillit, e njëjta fillimisht është dashur të pres deri në marrjen e vendimit të Komisionit për funksion shtesë si anëtare e komisionit për “Kontrollin e Tregtisë me Mallra Strategjike”.

Andaj, nisur nga baza ligjore e përmendur si më lartë, Kolegji i Këshillit, konstaton se ankesa e ankueses e parashtruar në Këshillin e Pavarur Mbikëqyrës për Shërbimin Civil të Kosovës me datë 15.09.2025 është parashtruar në kundërshtim me nenin 127 paragrafi 4 të Ligjit Nr.05/L-031 për Procedurën e Përgjithshme Administrative, dhe si e tillë nuk e plotëson kushtin e nevojshëm të pranueshmërisë së ankesës në kuptim të nenit 129 paragrafi 1 nën paragrafi 1.3 të Nr.05/L-031 për Procedurën e Përgjithshme Administrative ku përcaktohet se: *“Ankesa është e pranueshme nëse i plotëson këto kushte: 1.3. ajo është parashtruar brenda afatit të parashikuar nga neni 127 i këtij ligji.”*

Andaj, pas analizimit dhe vlerësimit të të gjitha shkresave të lëndës si dhe duke u bazuar nën 6 paragrafi 1, nën paragrafi 1.1 dhe nën 18 paragrafi 1 nën paragrafi 1.7 të Ligjit Nr.06/L-048 për Këshillin e Pavarur Mbiqyrës për Shërbimin Civil të Kosovës i ndryshuar dhe plotësuar me Ligjin Nr.08/L-180, Kolegji vendosi si në dispozitiv të këtij Vendimi.

Këshillë juridike: *Vendimi hyn në fuqi në ditën e nënshkrimit nga Kryetarja e Kolegjit. Kundër vendimit të Këshillit, pala e pakënaqur e mund të iniciojë konflikt administrativ në Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi.*

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.1696/2025

Hava FEKAJ

Procesmbajtëse

Malsore GASHI-BAJRAKTARI

Kryetar i Kolegjit

Vendimi i dërgohet

- Ankueses E.P;
- Udhëheqësit të Njesisë së Burimeve Njerëzore në Ministrisë së Industrisë, Ndërmarrsisë dhe Tregtisë; dhe
- Arkivit të KPMSHCK-së.